



PARLAMENT DE CATALUNYA

Resolució 742/IX deth Parlament de Catalonha, sus era orientacion politica generau deth Govèrn

Tram. 255-00006/09

Plen deth Parlament

Eth Plen deth Parlament, ena session hèta eth 27 de seteme de 2012, a debatut es proposicions de resolució presentades pes grops parlamentaris, subsegüents ath debat sus era orientacion politica generau deth Govèrn que se hec es dies 25, 26 e 27 de seteme.

Finaument, d'acòrd damb aquerò que dispòse er article 133 deth Reglament deth Parlament, a adoptat era següenta

Resolució

I. DRET DE DECIDIR

1. Eth Parlament de Catalonha reconeish e celèbre er enòrme succès dera multitudinària manifestacion que i auec en Barcelona eth passat 11 de seteme, jos eth lèma «Catalonha, nau estat d'Euròpa», e hè publica era sua voluntat de remassar e desvolopar es desirs que i exprimiren es ciutadans de manèra massiva e pacifica.

2. Eth Parlament de Catalonha constata que, ath long des darrèri trenta ans, ua part fòrça importanta deth catalanisme s'a comprometut seriosament damb era transformacion der Estat espanhòl entà hèr-i a encaishar Catalonha sense auer de renonciar as legitimes aspiracions nacionaus, ara voluntat d'autogovèrn, ne ara continuïtat coma nacion. Mès es temptatives d'encaish de Catalonha damb er Estat espanhòl e es sues reiterades responses negatives son aué ua via sense recorrut. Catalonha a d'iniciar ua naua etapa basada en dret de decidir.

3. Eth Parlament de Catalonha manifèste eth besonh que Catalonha hèsque eth sòn pròpri camin e qu'eth pòble catalan pogue decidir liurament e democraticament eth sòn futur collectiu, entà per'mor de garantir eth progrès social, eth desvolopament economic, er enfortiment democratic e eth foment dera cultura e era lengua pròpies.

4. Eth Parlament de Catalonha inste ath Govèrn, as fòrces politiquas e as agents socials e economics a impulsar eth maximum consens possible entà amiar a tèrme aquest procès democratic e eth fuelh de rota consegüent, dialogant damb era comunitat internacionau, era Union Europèa e eth Govèrn espanhòl, entà qu'es ciutadans de Catalonha poguen determinar eth sòn futur collectiu en un



PARLAMENT DE CATALUNYA

marc de plea libertat, respècte ath pluralisme, foment deth debat e convivència democratica, e sense cap de tipe de coaccion.

5. Eth Parlament de Catalonha constata eth besonh qu'eth pòble de Catalonha pogue determinar liurament e democraticament eth sòn futur collectiu e inste ath Govèrn a hèr ua consulta, prioritàriament ena propèra legislatura.

II. ETH HÈT NACIONAU

1. Eth Parlament de Catalonha constata qu'er Estat espanhòl non volec entèner era gravetat dera situacion creada pera sentència deth Tribunau Constitucionau deth 2010, que non respectèc era voluntat deth pòble de Catalonha exprimida en referendum en 2006 e que dèc lòc ara grana manifestacion deth 10 de junhsèga de 2010, e constata que, des d'alavetz, er Estat espanhòl non a sajat de milhorar era situacion e, a mès, er actuau govèrn a entreprés ua ofensiva recentralizadora que non respècte es competències dera Generalitat e s'a negat a discutir es proposicions gessudes deth Parlament de Catalonha.

2. Eth Parlament de Catalonha constata eth besonh qu'en aquest procès, que se produsís en un contèxte de sevèra crisi economica que provòque consequéncies grèus en grani sectors dera societat, se garantisque era coesion sociau deth país e era voluntat exprimida en multiples ocasions pera societat catalana de mantier Catalonha coma un sol pòble.

3. Eth Parlament de Catalonha exprimís era sua confidança ena maduresa deth pòble de Catalonha e en unic mecanisme valable entà resòlver es conflictes: era democràcia e eth respècte ara voluntat populara, pes quaus an lutat tantes persones en passat e, especiaument, en temps dera dictadura franquista.

4. Eth Parlament de Catalonha proclame solemnement, coma ja a hèt en d'aves ocasions transcendentaus, eth dret imprescriptible e inalienable de Catalonha ara autodeterminacion, coma expression democratica dera sua sobeiranetat coma nacion.

III. PROCÈS ENTÀ DEVIER UN NAU ESTAT D'EURÒPA

1. En moment excepcionau que viu Catalonha laguens deth procès entà devier un nau estat d'Euròpa, eth Parlament de Catalonha cre qu'ei imprescindibile reforçar es estructures e es instruments d'estat damb er objectiu de garantir era coesion sociau, eth progrès economic e era normalizacion e eth foment dera lengua e era cultura pròpies. En particular, ei imprescindibile trebalhar entà dotar Catalonha d'un instrument entà qu'es ciutadans poguen èster consultadi



PARLAMENT DE CATALUNYA

sus eth futur deth país. Aqueth instrument s'a de construïr des dera pròpria legalitat e legitimitat deth Parlament de Catalonha. Ath madeish temps cau defensar era vigència e aplicabilitat dera Lei 4/2010, de consultes populars per via de referendum, e continuar es trebalhs entà regular es consultes populars non referendàries, andues coma instruments entà qu'es ciutadans poguen exprimir era sua voluntat.

2. Eth Parlament de Catalonha constata que quinsevolh auanç cap a mès estructures d'estat implique eth besonh de defensar es estructures d'estat de qué s'a dotat Catalonha, especiaument es de toti es servicis publics que conformen er estat deth benestar, coma era educacion, era santat, es servicis sociaus e era cultura, e tanben es dera Administracion publica dera Generalitat e des ens locaux, es des relacions internacionaus e es des mieis de comunicacion publics.

IV. MEMÒRIA E DIGNITAT

1. Eth Parlament de Catalonha inste ath Govèrn dera Generalitat a exigir ath Govèrn der Estat qu'es conselhs de guèrra contra eth president Companys, Salvador Puig Antich e Joan Peiró e era rèsta d'assassinats judiciais cometudi pera dictadura franquista, que non sigueren pas uns judicis contra ues persones senon contra tot un pòble, siguen anulats per lei.

2. Eth Parlament de Catalonha inste ath Govèrn dera Generalitat a exigir eth retorn des documents catalans –documents e libres privats e d'auti materiaus– confiscadi e depositadi en Archiu de Salamanca qu'encara non an estat retornadi.

3. Eth Parlament de Catalonha manifèste eth sòn refús e era sua condemna des paraules deth coronèl dera armada espanhòla Francisco Alamán Castro, qu'a amenaçat publicament Catalonha damb ua intervencion militar s'òpte pera independéncia, a sollicitat er arrèst deth deputat deth Parlament Uriel Bertran e des deputats ath Congrès des Deputats Joan Tardà e Alfred Bosch, e a exigit era ilegalizacion des formacions politiquas Solidaritat Catalana pera Independéncia e Esquèrra Republicana de Catalonha. Atau tanben, eth Parlament de Catalonha exprimis era sua condemna dera Associacion de Militars Espanhòls, qu'a avertit as partits e grops parlamentaris independentistes qu'incorren «en un delicte de nauta traïson» e a exigit ath Govèrn espanhòl qu'actue abans que «es fòrces armades non se veiguen ena irremissibla e plan grèu tessitura de complir escrupolosament e estrictament era mission qu'era carta magna les autrage». Tanben a amenaçat dirèctament «as responsables d'auer permetut era amenaça de fractura d'Espanha o d'auer-i participat o collaborat» damb judicis somaris per «nauta traïson» en domeni dera jurisdiccion militar. Per açò, eth Parlament de Catalonha inste ath Govèrn dera Generalitat a exigir ath ministre espanhòl de defensa, Pedro Morenés, er arrèst immediat deth coronèl d'infanteria Francisco



PARLAMENT DE CATALUNYA

Alamán Castro, d'acòrd damb er article 28 dera Lei organica 8/1998, de regim disciplinari des fòrces armades, e eth sòn processament, entà que li quèigue dessús tot eth pes dera lei.

4. Eth Parlament de Catalonha considèrè eth dret ara autodeterminacion des pòbles un dret irrenonciable deth pòble de Catalonha. Atau ac a explicitat en diuèrses votacions eth Parlament, sedença dera sobeiranetat deth pòble de Catalonha. Aguest dret serà exercit quan eth pòble de Catalonha ac volgue. Deuant d'aguesta voluntat democratica, ua intervencion militar d'Espanha non serà acceptada en cap de cas pes organismes europèus e internacionaus.

V. ACCION POLITICA E DE GOVÈRN

V.1. AHÈRS INSTITUCIONAUS

V.1.1. Politica exteriora e projeccion internacionau

1. Eth Parlament de Catalonha, en procès de construccion d'un estat independent entara nacion catalana, considèrè fundamentau trebalhar pera projeccion internacionau dera realitat politica, economica e sociau deth país, e tanben fomentar er establiment de relacions permanentes damb era comunitat internacionau. D'acòrd damb aguesta voluntat, eth Parlament manifèste que, en matèria de politica exteriora, ei prioritari:

a) Desvolopar damb tota era sua potencialitat eth hilat de delegacions en exterior, priorizant, d'entre es foncions que complissen, er establiment de relacions permanentes damb es autoritats deth país a on son establides e damb es d'auti païsi, d'acòrd damb eth decret de constitucion corresponent.

b) Potenciar ua estratègia de relacion e trebalh damb es mieis de comunicacion d'influència internacionau entà projectar era realitat politica, economica e sociau de Catalonha, e tanben difóner es voluntats de futur qu'eth pòble de Catalonha manifèste democraticament.

c) Adoptar ua estratègia de dialòg e collaboracion constanta damb es institucions europèes, especiaument damb era Comission Europèa e eth Parlament Europèu, establir relacions bilateraus damb es autoritats des estats qu'an mès influència ena comunitat internacionau, e establir ua interlocucion permanenta damb era Organizacion des Nacions Unides e es organismes que ne depenen, entà facilitar eth reconeishement internacionau des decisions qu'eth pòble de Catalonha prengue sus eth sòn futur collectiu.

2. Eth Parlament de Catalonha inste ath Govèrn dera Generalitat a amiar a tèrme contactes e accion politica damb es organismes pertinents dera Union Europèa



PARLAMENT DE CATALUNYA

entà contribuïr a configurar ua agenda reformista entà Euròpa orientada ath creishement, era integracion e era consolidacion fiscau. An d'èster elements essenciaus d'aguest programa era constitucion d'un govèrn europèu, un calendari d'assumpcion per part des estats membres de mecanismes de coordinacion des politiquas economiques e un calendari d'integracion fiscau, era modificacion des estatuts deth Banc Centrau Europèu entà orientar-lo cap ath creishement economic, e er establiment d'un impòst sus es transaccions financèras.

3. Eth Parlament de Catalonha inste ath Govèrn dera Generalitat a reconéisher era independéncia dera Republica de Kosovo, coma an hèt es principaus democràcies occidentaus, e reclamar ath Govèrn der Estat espanyòl que respècte eth principi de legalitat, d'acòrd damb er article 10.2 dera Constitució espanyòla e es senténcias dictades peth Tribunau Internacionau de Justícia dera Organizacion des Nacions Unides, organizacion dera quau er Estat espanyòl n'ei membre.

V.1.2. Administracion publica e govèrns locals

1. Eth Parlament de Catalonha constata qu'era consecucion dera soberaneitat implique necessàriament ua reforma administrativa e un contèxte que justifique reformes pregondes entà construír era naua Administracion. Cau profitar eth camin cap a un estat damb estructures pròpies entà crear un modèl d'Administracion catalana que permete apregondir er estat deth benestar, que excellisque des deth punt de vista dera eficàcia e era eficiéncia e que sigue sostenible des d'un punt de vista economic. Cau delimitar des d'ara e formaument es objectius concrets dera reforma e iniciar era analisi des diuèrsi encastres qu'an de conformar un modèl pròpri d'Administracion. S'an de definir es politiquas publicas e er abast deth sistèma public; eth modèl organizatiu; es ens instrumentaus; era descentralizacion administrativa; era innovacion; era gestion, eth finançament e era avaloracion des servicis publicas; er accés ara foncion publica; era foncion directiva; eth marc contractuau e laborau ena administracion prestadora de servicis (santat, educacion, etc.); era avaloracion deth rendiment; eth sistèma retributiu, e era transparéncia.

2. Eth Parlament de Catalonha inste ath Govèrn a presentar-li tèxtes articulats d'ordenacion dera foncion publica, d'ordenacion instrumentau deth sector public e de definicion dera foncion directiva professionau.

3. Eth Parlament de Catalonha manifèste qu'er objectiu prumèr de quinsevolh estructura administrativa a d'èster prestar servicis de qualitat as ciutadans, independentament deth lòc a on visquen, ja qu'era fixacion en territòri tanben ei un element important de quinsevolh país. Entà hèr possible aguest objectiu, cau téner a crear uns govèrns locals damb un modèl competenciau asimetric que tengue en compde es principis de diferenciacion, capacitat de gestion e sufisença



PARLAMENT DE CATALUNYA

financera. Sus aguesti principis calerà bastir estructures administratives, en forma d'ajuntaments o de mancomunitats de municipis, que permeten aplicar critàris de simplificacion administrativa, eficiència e eficàcia. Aqueri principis tanben an d'èster aplicables ara configuracion d'estructures de dusau grad, qu'an de respectar es critàris d'eleccion dirècta o de representativitat dirècta des municipis entà guanhar en legitimitat democratica.

V.2. ECONOMIA

V.2.1. Relacions Generalitat - Estat

Eth Parlament de Catalonha constata qu'es decisions economiques preses peth Govèrn der Estat deth Partit Popular non sonque non ajuden a solucionar era grèva situacion economica, senon que d'ua manèra constanta e invariable prejudiquen dirèctament Catalonha e era pòcha des sòns ciutadans e retalhen sistematicament er escàs marge d'autogovèrn qu'a Catalonha entà afrontar era crisi. Era coerència sistematica d'aguestes mesures e es posicionaments ideologics des qui les inspiren revèlen ua estratègia que cerque enes dificultats economiques de Catalonha eth camin entà facilitar era sua assimilacion nacionau e culturau. D'entre es mesures qu'er Estat pren contra era economia catalana, eth Parlament de Catalonha refuse damb contundència:

a) Era reduccion des politiques actives d'aucupacion en moment mès critic, que comportarà entà Catalonha era pèrta de 260 milions d'euros, mès dera mitat deth pressupòst de qué disposaue er an 2011, e era desatencion de desempleats, de persones que vòlen milhorar era aucupabilitat, de collectius damb dificultats espciaus, de cooperatives e d'autonòms.

b) Er impagament des deutes pendants der Estat damb Catalonha, qu'arriben a mès de 8.600 milions d'euros: 5.700 milions d'euros d'infraestructures, 1.450 milions deth Hons de competitivitat entath 2011, 759 milions dera liquidacion d'inversions non executades d'acòrd damb era disposicion adicionau tresau der Estatut corresponents ar exercici deth 2008, 219 milions corresponents ath 2009, 719 milions corresponents ath 2010 e 969 milions corresponents ath 2011, a mès de 971 milions que non incorpòren es pressupòsti entath 2012 e de 472 milions deth deute istoric dera santat catalana damb era Seguretat Sociau abans deth traspàs en 1995, entre d'auti.

c) Era desleiautat institucional: es decisions de despena a cargue dera Generalitat que pren er Estat sense cap de contraprestacion economica arriben a 1.851,2 milions d'euros entath 2012.

d) Es restriccions arbitràries enes mecanismes d'endeutament: en aplicacion des mesures de contraròtle imposades pera Lei organica 2/2012, d'estabilitat pressupostària e sostenibilitat financèra, eth Govèrn der Estat dificulte era



PARLAMENT DE CATALUNYA

obtenció de crèdit d'entitats financeres, causa que provòque era pèrta de possibilitats acordades abans dera naua regulacion.

e) Era centrifugacion dera carga dera reduccion deth deficit: er Estat se resèrve eth marge temporau qu'era Union Europèa a autrejat entara reduccion deth deficit public, en detriment des comunitats autonòmes e des ens locals, damb ua planificacion qu'agreuège era situacion entath 2013.

f) Eth sistèma d'accès ath finançament de Catalonha, que barre eth pas as emissions conjuntes e òpte per intervencionisme que compòrte eth Hons de liquiditat autonòmica.

g) Eth descens deth 45% des inversions territorializadas entà Catalonha en Projècte de pressupòsti der Estat entath 2012.

h) Ua reforma deth sistèma financer que provòque ua pèrta de pes en centres de decision d'entitats financeres en Catalonha coma jamès non s'auie produhit.

i) Ua reforma des organs reguladors que comportarà un agreujament des condicions de competència en sectors estratergics e era pèrta dera sedença dera Comission deth Mercat des Telecomunicacions en Barcelona.

j) Ua poltica d'infraestructures erratica e refusada en Euròpa, que da prioritat ath corredor centrau de mercaderies per deuant dera logica economica, que recomanarie eth corredor mediterraneu.

k) Ua politica d'infraestructures que non da responsa a besonhs urgents qu'aurien un efècte immediat ena reactivacion economica, coma son es accèssi tàs pòrts de Barcelona e Tarragona, er accèss tar aeropòrt de Barcelona - El Prat mejançant eth servici de proximitat e era connexion de naua velocitat damb Euròpa, era amenaça d'alongament de concessions des peatges catalans entà compensar eth fracàs des peatges de Madrid, era naua accidentalitat en servici de trens de proximitat abordada d'ua manèra discriminatòria envèrs Catalonha, era aportacion diferenciau entre es sistèmes de transpòrt public metropolitans de Barcelona e de Madrid o era arturada dera gestion individualizada der aeropòrt de Barcelona, entà mèter sonque quauqui exemples.

V.2.2. Espoliacion fiscau

1. Eth Parlament de Catalonha constata que, as dificultats derivades dera crisi economica, i cau híger en cas de Catalonha era espoliacion fiscau que patís eth país un an darrèr der aute e qu'en 2009 artenehç era chifra de 16.409 milions d'euros annaus, que representen eth 8,4% deth producte interior brut de Catalonha, recorsi que paguen es catalans ar Estat e que non tornen tà Catalonha en forma de despena o d'inversion publica. Aquest deficit fiscau ei d'ua



PARLAMENT DE CATALUNYA

gravetat e d'ua injustícia que non an comparèr damb aquerò que succedís en cap aute estat d'Euròpa qu'age un cèrt nivèu de descentralizacion administrativa. Ei ua espoliacion economica constanta en temps, qu'a aquest orde de magnitud des de que se mesure, qu'asfíxie es estructures sus es quaus se mantien es servicis publics de Catalonha. Se Catalonha disposèsse d'aqueri recorsi, poderie èster un país damb un estat deth benestar des mès solides e solvables d'Euròpa.

2. Eth Parlament de Catalonha inste ath Govèrn a informar ara opinion publica qu'es servicis publics an en Catalonha un finançament *per capita* molt per dejós dera mieja dera Union Europèa des quinze, hèt que non se correspon damb er esfòrç fiscau que hèn es ciutadans e es empreses de Catalonha, e inste tanben ath Govèrn a informar ara opinion publica qu'era causa deth deficit de finançament des servicis publics ei era espoliacion fiscau que patís Catalonha a mans d'Espanha, e qu'ei aquesta espoliacion çò que s'a d'abolir urgentament entà per'mor d'acabar damb es retalhades e poder hèr politiques de reactivacion economica.

V.2.3. Instruments financers e luta contra eth frau fiscau

1. Eth Parlament de Catalonha manifèste eth besonh de hèr es actuacions necessàries e dar supòrt as tramitacions legislatives pertinentes entà dotar ar Institut Català de Finances der estatus juridic de banc, entà per'mor de convertir-lo en un banc public ath servici dera recuperacion economica e era coesion social.

2. Eth Parlament de Catalonha manifèste que cau intensificar era luta contra eth frau fiscau e era economia submergida, manifèste eth sòn refús ara amnistia fiscau instaurada e gestionada peth Govèrn espanhòl, ja que se tracte d'ua mesura tributàriament injusta entà toti es ciutadans que complissen es sues obligacions fiscaus, e inste ath Govèrn a presentar ath Parlament un plan contra eth frau fiscau.

V.2.4. Reactivacion economica

1. Eth Parlament de Catalonha constata eth besonh d'impulsar estratègies en favor dera economia productiva, dera indústria e deth coneishement, e constata tanben eth besonh d'impulsar era creacion d'aucupacion, era economia verda, es politiques socials e era defensa d'un trebalh digne, entà arténher un modèl productiu, toristic e agroalimentari ecologicament sostenible e sociaument just e arténher qu'era economia sigue ath servici des persones e deth territòri.

2. Eth Parlament de Catalonha manifèste qu'eth caractèr industriau dera economia catalana ei era milhor airina estrategica de qué dispòse eth país entà tornar a èster capdevantèr, gèsser dera crisi e crear lòcs de trebalh, e manifèste



PARLAMENT DE CATALUNYA

atau madeish que cau priorizar es esfòrci metudi enes instruments de supòrt ara economia productiva e ampliar es recorsi dedicadi ara politica de clústers entà generar lòcs de treball estables e de qualitat, damb supòrt ath teishut empresariau de Catalonha, e incrementar tanben era captacion d'inversions industriaus exteriore. Per tot açò, eth Parlament de Catalonha cre que laguens dera propèra legislatura, sense dilacions, cau:

a) Impulsar es modificacions legislatives necessàries entà afavorir era activitat industriau e productiva, en consens damb es agents socioeconomics, e era creacion de lòcs de treball mejançant eth supòrt ara emprendoria, ath treball autonòm e ara petita empresa e era microempresa.

b) Reforçar, per miei dera Agència de Supòrt ara Empresa Catalana (ACC1Ó), es programes d'assessorament e de milhorament dera estratègia coma instrument entar accés as politiquas d'innovacion e d'internacionalizacion e reimpulsar ua politica de clústers que recuelhe es recomanacions dera Union Europèa, damb er objectiu que siguen mès grani, fomenten era internacionalizacion des petites e mieges empreses, cerquen era excelléncia ena gestion, estimulen era innovacion e era especializacion, agen un caràcter intersectoriau, se basen ena estratègia empresariau e en mercat finau e considèren era aparicion de naues indústries emergentes entà optar as inversions des hons estructuraus europèus entath periòde 2014-2020.

c) Reforçar, deuant des dificultats de finançament des diferenti sectors productius, era foncion de supòrt der Institut Catalan de Finances ath finançament deth sector industriau e deth sector agroalimentari.

d) Hèr un seguiment personalizat de totes es empreses que presenten un expedient de regulacion d'aucupacion entà cercar alternatives que permeten era viabilitat dera empresa e minorar era pèrta de lòcs de treball.

e) Desplegar ua politica de supòrt, d'orientacion e de promocion internacionau des poligòns industriaus de Catalonha, un còp evaluada era situacion actuau, e proposar es cambis legaus necessaris.

3. Eth Parlament de Catalonha constata eth besonh d'elaborar un plan estrategic de reactivacion dera indústria en Catalonha, entara recuperacion economica, basat ena innovacion e era exportacion e ena captacion d'inversions a partir deth plan d'actuacions industriaus e empresariaus.

4. Eth Parlament de Catalonha cre qu'ei imprescindible potenciar es politiquas d'internacionalizacion dera economia catalana, impulsant eth treball amiat a tèrme pera Agència de Supòrt ara Empresa Catalana damb vista ath foment des exportacions, tant per çò que tanh ar increment dera valor des exportacions coma per çò que tanh ara obertura de nau mercats, e damb vista ara captacion



PARLAMENT DE CATALUNYA

d'inversions, continuant eth procès de plea integracion en comèrç mondiau e ena economia globalizada.

5. Eth Parlament de Catalonha inste ath Govèrn a presentar un projècte de lei entà incentivar era activitat economica e era empenedoria, qu'includisque, entre d'auti objectius:

a) Era creacion e dotacion de diuèrsi hons especifics entà impulsar projèctes restacadi ara recèrca, eth desenvolopament e era innovacion empresariaus.

b) Era creacion e dotacion d'un hons entà impulsar era eficiéncia energetica enes cases e enes empreses.

c) Era creacion e dotacion d'un hons entà impulsar es projèctes d'autoocupacion enes barris includits en Plan de barris.

d) Mesures de supòrt dirècte as empenedors.

e) Er impuls financèr as projèctes dera indústria culturau, damb er objectiu de hèr deth sector culturau un des sectors clau ena definicion d'un nau modèl de desenvolopament social e economic, des der acòrd social e politic e damb un caractèr multidisciplinari e transversau que compregue es encastres dera educacion, eth coneishement, era investigacion o era economia.

6. Eth Parlament de Catalonha inste ath Govèrn a agotar es linhas de crèdit previstes per Institut Catalan de Finances entath supòrt as empreses, e especiaument entara metuda en marcha de projèctes de naues empreses o d'inversions.

V.2.5. Comèrç e torisme

1. Eth Parlament de Catalonha manifèste era importància deth comèrç coma sector generador de lòcs de treball e, per aquest motiu, considèrè qu'ena propèra legislatura cau trabalhar pera continuïtat deth modèl comerciau catalan, en qué eth comèrç de proximitat conviu en un just equilibri damb era aufèrta des superfícies mieges e granes, e refuse damb contundéncia es invasions competenciaus, que sonque pretenen trincar eth modèl comerciau catalan mejançant ua naua normativa liberalizadora des oraris comerciaus e des emplaçaments de nau comèrci.

2. Eth Parlament de Catalonha constata er interès especiau deth sector toristic, qu'apòrte eth 13% deth producte interior brut catalan e qu'ei un gran generador de lòcs de treball, e manifèste que, per aqueth motiu, cau continuar potenciant ena propèra legislatura era marca «Catalonha» coma destinacion toristica nacionau que se distiguís pera qualitat e era multiplicitat d'aufèrtes e paisatges,



PARLAMENT DE CATALUNYA

incorporant-i es marques des destinacions toristiques catalanes reconeishudes internacionaument, e cau continuar desvolopant un programa d'actuacions entà qu'es visitants perceben era realitat deth país pendent era estada en Catalonha, per miei deth supòrt ara creacion, eth desvolopament e era promocion des productes toristics, d'acòrd damb es nauï paradigmes deth torisme recomanadi pera Organizacion Mundiau deth Torisme, com era creacion de rotes tematiques, era metuda en valor d'aquerò qu'ei intangible e era metuda en valor dera identitat e era autenticitat.

V.2.6. Sector agroalimentari

1. Eth Parlament de Catalonha constata er interès estrategic deth sector agroalimentari coma hònt d'aucupacion e competitivitat dera economia catalana, e considèra que s'a de garantir en quïnsevolh circumstància er accés dera poblacion de Catalonha as aliments, tant en qualitat com en quantitat. En aqueth sentit, eth Parlament considèra que cau potenciar e desvolopar ath maximum era capacitat de generar aucupacion deth sector agroalimentari enes sòns airaus productiu e industriau, mejançant era aplicacion e eth compliment estricte dera Resolucion 671/VIII deth Parlament de Catalonha, deth 14 d'abriu de 2010, subsegüent ath debat monografic sus eth mon agrari, e se compromet a velhar especificament entà que s'aprofiteu toti es recorsi multiplicadors dera inversion que facilite eth cofinançament estatau e europèu des accions incluides en Plan de desvolopament rurau 2007-2013 e s'incrementen era planificacion e era prospectiva des recorsi disponibles e des besonhs presents e futurs entà garantir simultanèament era continuïtat dera activitat agroalimentària e era sufisença alimentària en Catalonha.

2. Eth Parlament de Catalonha inste ath Govèrn a elaborar un estudi d'impacte economic entà poder conéisher quina politica agrària comuna ei mès beneficiosa entath sector agrari catalan.

3. Eth Parlament de Catalonha inste ath Govèrn a cercar solucions ara problematica principau deth sector agrari, qu'ei auer de véner es sòns productes per dejós deth prètz de còst, agreujada pera intervencion de massa intermediaris entre era obtencion deth producte e era arribada deth producte ath consumidor, e damb aquest objectiu inste ath Govèrn a:

a) Elaborar un decret de foment dera venta dirècta.

b) Elaborar un plan estrategic de hilats de proximitat.

c) Mantièr e incrementar era activitat der Observatòri Agroalimentari de Prètz de Catalonha, coma airina necessària entà promòir era transparéncia en establiment des prètz en toti es passi dera cadena, e dera Comission de Bones Practiques Comerciaus, entà promòir era interrelacion entre es diferents agents.



PARLAMENT DE CATALUNYA

V.2.7. Infraestructures

1. Eth Parlament de Catalonha manifèste qu'era politica d'infraestructures estatau non a seguit critèris de logica economica e de supòrt ara economia productiva e, per aqueth motiu, demane ua virada copernicana d'aguesta politica.

2. Eth Parlament de Catalonha denòncie era grèva e preocupanta desleiatat institucionau practicada aguesti darrèri dus ans pes diferents govèrns der Estat respècte a Catalonha, especiaument en incompliment dera disposicion addicionau tresau der Estatut de Catalonha, damb ua quantitat pendent de crubament enquiath 2012 qu'arribarie as 2.849,27 milions d'euros, manifestat en impagament des ans anteriors e en projècte de pressupòsti generaus der Estat deth 2012.

3. Eth Parlament de Catalonha se ratifique en contengut dera Mocion 73/IX e, singularament, considèrè inajornable reclamar er inici des òbres d'accès ferroviari ath pòrt de Tarragona e ara naua terminau deth pòrt de Barcelona, individualizar era gestion der aeropòrt de Barcelona, desdoblar era via entre Vandellòs e Tarragona, connectar damb vies de nauta capacitat ferroviària damb Euròpa e connectar damb eth servici de proximitat era terminau 1 der aeropòrt de Barcelona coma mesures qu'incidissen especiaument ena recuperacion economica.

4. Eth Parlament de Catalonha inste ath Govèrn dera Generalitat a reclamar era transferéncia deth hilat de carretèrers der Estat ara Generalitat, d'acòrd damb er article 150.2 dera Constitucion espanhòla, damb era finalitat d'acabar damb era deishadesa der Estat en acabament d'infraestructures de primèr orde entà Catalonha, com ei eth desdoblament dera N-II ath pas pes comarques gironines. Er exercici dera competéncia transferida a d'èster assumit pera Generalitat de Catalonha en moment qu'age efectivitat era transferéncia des mieis personaus e materiaus e pressupostaris necessaris, mejançant un acòrd dera Comission Mixta de Transferéncias Estat - Generalitat de Catalonha e eth corresponent reiau decret de traspàs de servicis.

V.3. POLITIQUES SOCIAUS

V.3.1. Politiques d'aucupacion

1. Eth Parlament de Catalonha inste ath Govèrn a presentar un projècte de lei d'aucupacion que permete respòner as besonhs d'intermediacion, orientacion laborau e formacion aucupacionau des persones sense trebalh.



PARLAMENT DE CATALUNYA

2. Eth Parlament de Catalonha inste ath Govèrn a presentar un plan de chòc contra eth caumatge juvenil e contra eth caumatge de longa durada, entà evitar era exclusion social.

V.3.2. Egalitat d'oportunitats

1. Eth Parlament de Catalonha manifèste qu'es politiques entara egalitat d'oportunitats e eth benestar son ua part indestrigabla deth conjunt d'accions que cau emprèner entara reactivacion economica e era gessuda dera crisi. Eth modèl de societat que defensam entà Catalonha place as persones en centre des sues prioritats e considere qu'eth benestar, eth compromís damb era inversion publica educativa, social e sanitària e era egalitat son premisses basiques dera libertat des persones e, donc, son objectius irrenonciables.

2. Eth Parlament de Catalonha constata eth besonh de dar compliment as compromisi artenhudi enes pressupòsti entath 2012 respècte ath pagament des ajudes as centres especiaus de trebalh d'iniciativa social.

3. Eth Parlament de Catalonha inste ath Govèrn a complir de manèra immediata era Mocion 59/IX, damb relacion as persones damb discapacitats.

4. Eth Parlament de Catalonha constata eth besonh de garantir era egalitat de tracte de totes es persones empadronades en Catalonha en accés as servicis publics e, en concrèt, ara santat, tau com establís eth Pacte nacionau entara immigracion.

5. Eth Parlament de Catalonha cre qu'ei imprescindible aplicar era Lei 10/2010, d'acuelhuda des persones immigrades e des retornades tà Catalonha, e desplegar era Agéncia d'Acuelhuda de Catalonha, entà auferir formacion en lengua catalana e coneishement dera societat catalana, deth mercat laborau e dera legalitat a totes es persones immigrades tà Catalonha.

6. Eth Parlament de Catalonha considèra prioritari e urgent priorizar era luta contra es desnonaments e era pèrta deth lotjament per impagament des quòtes hipotecàries o de loguèr enes politiques socials de lotjament, impulsant vies de mediacion e reestructuracion deth deute, en prumèr cas, e impulsant un parc public de loguèr, en dusau cas, especiaument.

V.4. ENTORN NATURAU E SOSTENIBILITAT

1. Eth Parlament de Catalonha constata eth besonh de desvolopar un nau modèl productiu basat ena sostenibilitat e era prosperitat, qu'a de seguir es linhes basiques següentes:



PARLAMENT DE CATALUNYA

a) Era actualizacion e era aplicacion efectiva des plans de mitigacion deth cambi climatic e de qualitat der aire.

b) Ua politica de reduccion, recuperacion e valorizacion des residus urbans e industriaus.

c) Era metuda en valor des nomentadi servicis mieiambientaus qu'era biodiversitat apòrte ara societat, ara economia e ara qualitat de vida, mejançant era aprobacion dera lei de proteccion dera biodiversitat, des plans de gestion e utilizacion des espacis d'interès naturau e deth plan forestau de Catalonha.

d) Eth garantiment deth debit ecologic deth riu Ebre, qu'a de perméter eth desvolopament des foncions ecologiques deth riu, eth dèlta e er ecosistèma marin des entorns, e era mantenença, ath madeish temps, dera activitat socioeconomica que s'i desvolope.

2. Eth Parlament de Catalonha, deuant dera imminenta aprobacion deth nau Plan hidrologic dera conca der Ebre, exigís era defensa deuant des institucions europèes d'un debit ecologic sufisent entath tram finau deth riu Ebre e eth sòn dèlta, d'acòrd damb es demanes e es estudis fixadi pera Comission entara Sostenibilitat des Tèrres der Ebre e es allegacions presentades pes institucions catalanes ath nau Plan dera conca der Ebre.

3. Eth Parlament de Catalonha inste ath Govèrn dera Generalitat, en cas qu'eth Govèrn espanhòl concedisque eth transvasament deth riu Ebre, a oposar-se-i e a utilizar toti es mejans administratius, juridics e politics entà impedi'c, includint-i eth blindatge juridic damb eth maximum rang deth debit deth riu Ebre e establint un debit ecologic que hèsque impossible cap de transvasament.

4. Eth Parlament de Catalonha reclame continuar eth calendari previst entà garantir eth progressiu e rapid retorn dera aigua deth transvasament deth Ter tara sua conca.

5. Eth Parlament de Catalonha inste ath Govèrn a crear, sus era basa der Institut Catalan d'Energia, era Agència Catalana dera Energia, coma part activa ena construccion d'un nau modèl energetic.

6. Eth Parlament de Catalonha inste ath Govèrn a accelerar eth projècte Zèfir d'energia eolica marina.

7. Eth Parlament de Catalonha inste ath Govèrn a:

a) Promòir es veïculs electricis enes viles e ciutats catalanes, especiaument es veïculs de dues ròdes, ja que contribuïssen a milhorar sensiblement era mobilitat urbana e dispòsen d'ua valor ahijuda restacada ara sostenibilitat e eth respècte ar entorn naturau.



PARLAMENT DE CATALUNYA

b) Promòir era adaptacion, per part des administracions competentes, des estructures urbanes e des plans urbanistics, e adaptar es infraestructures de transpòrt ara futura realitat deth veïcul electric, tient en compde en toti es casi era complexitat juridica, derivada des leis espanhòles sus distribucion d'energia electrica, especificament entà veïculs electric, de manèra que per tot eth territòri nacionau i age punts de connexion, qu'aqueri punts de connexion siguen identificables per miei des cercadors d'Internet, e qu'en toti es casi se dongue preferéncia ara implantacion d'estructures de captacion d'energia de hònts renovables e ara reconversion d'espacis degradats o ja destinats actuaument a servicis entàs veïculs.

V.5. LENGUA E CULTURA

V.5.1. Politica lingüística

1. Eth Parlament de Catalonha inste ath Govèrn a velhar peth compliment dera Lei 22/2010, deth Còdi de consum de Catalonha, vigent des deth 23 de junhsèga de 2011, qu'establís que toti es productes que se venen en Catalonha an d'èster etiquetadi en catalan.

2. Eth Parlament de Catalonha inste ath Govèrn a defensar per toti es mieis administratius, juridics e politics era Lei 35/2010, der occitan, aranés en Aran, e a potenciar era lengua e era cultura d'Aran.

3. Eth Parlament de Catalonha inste ath Govèrn a empréner es accions necessàries entà garantir er ensenhament en lengua catalana en País Valencian en tot eth sistèma educatiu.

V.5.2. Politica culturau

1. Eth Parlament de Catalonha constate er interès estrategic dera cultura e manifèste era sua conviccion qu'es sectors culturaus devien un element essenciau entara creacion de riquesa e que, per aqueth motiu, ena propèra legislatura ei imprescindible trebalhar entà qu'eth conjunt d'administracions recupèren es sues aportacions ath nivèu deth 2010 entàs equipaments culturaus deth país, quan es ingrèssi dera Generalitat tornen a recuperar-se, e dessenhar, conjuntament damb es autes administracions publiques que i intervien, un plan entà minimizar er impacte provocat pera reduccion des ingrèssi que priorize eth supòrt as ens locals e as creadors culturaus, sustot aqueri que, pera sua fragilitat a causa des dimensions o dera precarietat consubstanciau, an mès dificultats entà afrontar era situacion de crisi actua.



PARLAMENT DE CATALUNYA

2. Eth Parlament de Catalonha inste ath Govèrn a impulsar e finalizar eth Plan estrategic dera cultura e er Acòrd nacionau entara cultura des deth pacte sociau e politic.
3. Eth Parlament de Catalonha constate eth besonh de garantir un scenari economic entàs programes culturaus que dongue compliment ar Estatut, per çò que tanh as garanties publiques deth dret d'accès ara cultura, e que dongue responsa ara situacion critica des sectors culturaus deuant dera crisi economica, e especiaument deuant der increment der IVA.
4. Eth Parlament de Catalonha inste ath Govèrn a promòir un plan de chòc que respone ara situacion critica des sectors culturaus deuant dera crisi economica, e especiaument deuant der increment der IVA.
5. Eth Parlament de Catalonha constate eth besonh d'establir un programa de supòrt ara programacion culturau des ens locals que dongue prioritat as creacions de proximitat, que concrète es mesures entà afavorir era contractacion d'espectacles d'arts sceniques, musica e itineràncies d'arts visuaus, e tanben es programes de creadors enes escoles.
6. Eth Parlament de Catalonha cre qu'ei imprescindible desplegar damb tota era sua potencialitat era Lei 20/2010, deth cinema, en tant qu'ei er instrument entara produccion, era distribucion e era comercializacion d'ua ofèrta de cinema en catalan e entath refòrç dera indústria culturau catalana.
7. Eth Parlament de Catalonha inste ath Govèrn a defensar era unitat deth Musèu Diocesan de Lhèida e a emprèner es accions juridiques e legaus entà mantier era integritat dera colleccion deth Musèu coma expression dera cultura catalana.

V.6. EDUCACION, UNIVERSITATS E RECÈRCA

V.6.1. Educacion

1. Eth Parlament de Catalonha inste ath Govèrn dera Generalitat a oposar-se ath projècte de lei organica entara milhora dera educacion, que preten aprovar eth ministre espanhòl d'educacion, José Ignacio Wert, perque invadís clarament es competències dera Generalitat, e a servir-se, en aguesta oposicion, de toti es mieis qu'age ar abast –administratiu, juridic e politic– entà impedi'c.
2. Eth Parlament de Catalonha considèra prioritari e urgent refusar era recentralizacion e era invasion de competències que represente eth projècte de naua lei organica d'educacion aprovat peth Govèrn der Estat e aplicar era Lei d'educacion de Catalonha (LEC) per dessus de quinsevolh auta legislacion o



PARLAMENT DE CATALUNYA

jurisprudència constitucional, tot preservant eth prètzhèt des centres educatius e es docents en aplicacion dera LEC.

V.6.2. Universitats e recèrca

1. Eth Parlament de Catalonha manifèste qu'era politica d'universitats e recèrca ei estrategica entà que i age un cambi de modèl productiu e se garantisque era mobilitat e era egalitat d'oportunitats en Catalonha. En aquest sens, cau:

a) Apregondir en desenvolopament deth modèl pròpri catalan de recèrca e innovacion, representat en Pacte nacionau entara recèrca e era innovacion.

b) Fomentar ua politica universitària basada ena qualitat academica, er accés universau, era cooperacion damb era societat e era redicion de compdes.

c) Dotar as centres de recèrca deth finançament e es airines necessàries entà desenvolopar es sues activitats e entà que continuen situant-se coma centres de referéncia internacionau.

d) Impulsar era collaboracion damb es sectors productius afavorint era transferéncia dera recèrca, impulsar es doctorats industriaus e fomentar era contractacion d'investigadors postdoctoraus per part des empreses.

2. Eth Parlament de Catalonha constata eth besonh de dar plen compliment as objectius e compromisi deth Pacte nacionau entara recèrca e era innovacion.

V.7. SELECCIONS ESPORTIVES

1. Eth Parlament de Catalonha inste ath Govèrn a tier en compde, ena elaboracion des pressupòsti e ara ora d'establir es critèris entàs subvencions en matèria esportiva, de manèra prioritària es federacions qu'an era seleccion catalana oficializada, entà poder portar internacionaument era marca «Catalonha» coma referent esportiu.

2. Eth Parlament de Catalonha cre qu'ei imprescindible amiar a tèrme es actuacions necessàries entà qu'es federacions esportives catalanes, en exercici des sòns drets e en desenvolopament des sòns legitims objectius esportius, poguen sollicitar liurament er ingrès ena federacion internacionau corresponenta, e atau poder participar en competicions internacionaus oficials.

V.8. MIEIS DE COMUNICACION PUBLICS



PARLAMENT DE CATALUNYA

1. Eth Parlament de Catalonha constata eth besonh de refermar eth compromís damb un modèl de mieis de comunicacion publics en lengua catalana, garant dera pluralitat e era innovacion e impulsor de produccions e empreses deth sector audiovisuau catalan, e d'assegurar es ingrèssi per miei deth finançament mixte e sufisent dera ràdio e era television publiques e facilitar era reciprocitat des emissions de TV3 e Canal 9 en País Valencià e Catalonha.
2. Eth Parlament de Catalonha cre imprescindible reforçar e enfortir eth papèr des mieis publics de comunicacion englobadi laguens dera Corporacion Catalana de Mieis Audiovisuaus entà garantir ua informacion curosa, complèta, plurau e vertadèra as ciutadans, atenent totes es franges d'edat e es diferents domenis sociaus e territoriaus, d'acòrd damb es paramètres fixadi en Mandat marc deth sistèma public audiovisuau catalan, aprovat peth Parlament er 11 de hereuèr de 2010.
3. Eth Parlament de Catalonha inste ath Govèrn a garantir era libertat d'informacion e a arténher era recepcion des canals de Television de Catalonha en País Valencià.

Palai deth Parlament, 27 de seteme de 2012

Eth secretari tresau

Era presidenta deth Parlament

Josep Rull i Andreu

Núria de Gispert i Català